

## **Í yu'xarij ti hua'puaj a'ín ti jo'yú'xaca' í San Pedro**

### *Pedro pu hua'tyojtye'*

<sup>1</sup> Nyáaj Simón í nyaj Pedro pué'een, í nyaj jahuiire' í Ciriístu' ti ajta Jesús pué'een, a'yaa nu já'muatyojtye' mu siaj a'yan cha'taj siana'aj tyá'tzaahuatye' tyati'ij ityáj, ji'nye í Dios ajta a'íjna Jesús ti ajta Ciriístu' pué'een, a'íi mu ji'réenya'aj séejre'. <sup>2</sup> Che' jéehua tya-jamuáaci'tyij í ti jin tyámua' tyajamuatá'caa, ajta ti'ij jamuaatyápua'ritye'en a'íjna jime' siaj jamua'tyej í Dios siajta a'íjci í Jesús í ti ajta tavástara' pué'een.

### *Je'ej ti tyi'huóoxie've' a'íjma jimi í Dios ti huo'tajé*

<sup>3</sup> A'íjna í ti jin néijmi'i putyí'uurej í Dios, a'íj pu jin tyitaatá' néijmi'i í ti tyúuxie've' tyej tyij júurij huatyá'itzeere'en a'íjna jimi í ti taatajé, a'íjna í ti jusén jin naa huasé'rin, ajta a'ín néijmi'i jin antyúumua'reej. <sup>4</sup> A'íj pu jitze ma'can í ti jin va'cán tya'tóoraj taatajé, ti ajta jéehua tajitzé juxie've', tyej tyij a'íjna jin a'yan séeria'aj tá'ra'nyij ti'ij í Dios, tyata'aj tyij huatáta'uunaj a'íjci jimi í ti je'ej pua'aj huasé'rin í maj jin a'yan tyá'xie've' íiyan cháanacaj japua. <sup>5</sup> A'íj xu jin jéetze' huatyóoca'nyej a'íjna jime' í siaj jin tyá'tzaahuatye' siajta tyámua' tyityetyúucha'íij, siajta tyámua' tyiyo'itéej xá'ra'nyij í siaj jin

tyámua' tyityetyúucha'íij. <sup>6</sup> Siajta i siaj jin tyámua' tyá'mua'reej, a'íj xu jin huóocu'vej, ajta i siaj jin óocu'vej a'íj xu jin néijmi'i tyo'táviicue', ajta i siaj jin néijmi'i tyo'táviicue', a'íj xu jin tyaatatyójtzi're'en i Dios, <sup>7</sup> ajta i siaj jin tyé'tyoytzi're' i Dios, a'íj xu jin tyámua' tyityetyóojeevej, ajta siati'íj tyámua' tyityetyojéeven aj xu sij tyámua' naa tyityahuóoxie've'en.

<sup>8</sup> Tipua'aj mua'aj néijmi'i jin a'yan xáarinyij je'ej siaj tyi'íj tyu'yí'tin, a'íjna i ja'mua júuricamej jéehua pu tyu'tyáhuíire'ej a'íjna jime' siaj jaamua'aj tzáahuatyira'aj jime' i tavástara' Jesús ti ajta Ciriístu' pué'een. <sup>9</sup> Ajta a'íjna i tiquee a'yan ricij a'yaa pu een ti'íj i a'tíj ti arácun tiquee imuáj tyí'sej, a'íj pu arí yo'huá'xi ti i Dios tyaatú'uunyi'ri' je'ej ti tyi'tíj jin quee xá'pui' huaríj. <sup>10</sup> A'íj xu jin nye'ihuáamua', siata'aj huatyóoca'nyej siaj sij a'yan huárinyij je'ej ti tyi'tíj jin i Dios tyajamuaatajé ajta jamua'antyíhuoo, ji'nye tipua'aj a'yan xáarinyij caxu a'náj tyi'tíj jin ootyá'itzeere'ej. <sup>11</sup> A'yaa pu tyajá'muaci'tyij, siaj a'áa jo'tyájrutyey jo'tij jusén jime' tyejé'íjtaj i tavástara' i ti tajapúa huatanyúj, a'íjna i Jesús ti ajta Ciriístu' pué'een.

<sup>12</sup> A'íj nu jin a'yan tyajá'mua'ixaatye'ej na'mej, siaj sij a'yan tyá'mua'reeriaj, tyij siajta serij tyámua' een a'yájna nyati'íj tyajamuaamuá'tyej. <sup>13</sup> A'yaa pu tyí'nyaci'puaj nyey nyij tyámua' tyajamuá'ixaatye' nyajta ca'nyíjra'aj jamuaata'an íjij nyey nyooj júurij. <sup>14</sup> A'íjna i tavástara' Jesús ti ajta Ciriístu' pué'een, a'yaa pu tyinaaté'exaaj

ti arí véjri' a'náj nyaj jitzán mui'nyij, <sup>15</sup> A'yaa nu nyij tyu'tyényaca'nyesij, nyej nyij tyajamuáa'itiiij ti'ij huatái'riitarej siaj jo'támua'reej je'ej nyaj tyajamuáa'ixaa.

<sup>16</sup> A'íjna i tyaj jamuaamua'tyej je'ej ti éenye'que' huataséjre'sij a'íjna i tavástara' Jesús ti ajta Ciríistu' pué'een, a'ájna xicáara' jitze ti'ij ajtáhua'aj yava'cányesij, catu a'íjna jin jaataxájtaca' i nyúucarij i maj jujímua'aj mana'aj jájtyo i tyétyacaa, catu tyajta tajímua'aj tyana'aj jájtyo, sulu tají'ij tu jin jaaséj ti a'íin néijmi'i jin antyúumua'reej. <sup>17</sup> A'yaa tu tyeeséj ti'ij i Dios tyámua' tyeetyájtoo, ajta tyámua' tyaatá', ajta i Dios a'yan tyu'taxájtaca' tijn: "A'íi pu a'íin pué'een i nyiyóoj i nyaj jéehua huápu'i'ij jaxie've', a'íi pu a'íin pué'een i nyaj ja'antyíhuoj." <sup>18</sup> Ityáj tu jáanamujri' a'íjci i nyúucarij ti jútye' je'cánamujre, ji'nye jamuán tu ajo'tyú'uuca'aj i tavástara' a'ájna i jiríj jitze ti tyámua' tyejé'een.

<sup>19</sup> A'íj pu jin jéetze' ámiteere' quee a'íjna i nyúucarij i maj jaataxájtaca' a'íimaj i maj Dios jitze tyí'xajtaca'aj, a'íj xu jin mua'aj tyámua' tyá'tzaahuatye'. Ji'nye a'íjna i nyúucarij a'yaa pu een ti'ij a'íjna i tatzárij jo'tij jo'tíca' 'asta na'aj quee huataséjre'en a'íjna i xú'ra'vej ti'ij tapuá'risima'caj ujé'ejnyinyij, ti'ij jamuaatyátatzavi'tye'en. <sup>20</sup> Ajta anaquéej a'yan tyúuxie've' siaj jáamua'reej tiquee a'tíj a'náj jusíj je'ej tyéejtyoj je'ej ti huatóomua'aj a'íjna i nyúucarij ti jitzán á'yu'si'ij i yu'xarij je'ej maj tyu'taxájtaca' a'íimaj i maj Dios jitze

ma'can tyí'xajtaca'aj, <sup>21</sup> ji'nye a'íimaj i maj Dios jitze ma'can tyí'xajtaca'aj, camu a'náj a'yan tyu'taxájtaca' je'ej maj tyi'tíj jujímua'aj mana'aj tyí'ijtyoj, sulu Dios jitze ma'can mu a'yan tyu'taxájtaca', majta a'íjna jime' i júuricama'ra' i Dios.

## 2

### *A'íimaj i maj hue'tzij jin tyihuá'mua'tyej*

<sup>1</sup> Jéehua mu majta i tyeítjee huataséjre'ej a'íjma jimi i maj Israel jitze ajtyáma'can, i maj hue'tzij jin tyihuá'mua'tyej, a'íj mu jin jéehua ja'mua jimi séejre' a'íimaj i maj hue'tzij jin tyaja'muamua'tyej. Avíitzij mu jin a'yan ricíj mua'ajmaj jimi, a'yaa mu mij a'íjna jamuoyo'riésij, majta jatyáhue'tacaa i tavástara' a'íjna i ti ajta hua' jime' tyu'nájchitaca', a'íj pu jin a'yan tyihuá'ci'tyij ti i Dios jiye'tzín hua'antyipuá'ritye'en. <sup>2</sup> Mue'tíj mu hua'rá'astijre'ej mej mij a'yan cha'taj mana'aj tyityahuóoxana'cire'en mati'ij a'íimaj, a'yaa mu mij a'íjna jin je'ej pua'aj tya'xáataj muá'ju'un a'íjci i nyúucarij ti xá'pui'. <sup>3</sup> A'yaa mu a'íjna jin hue'tzij tyihua'mua'tyáaj muá'ju'un a'íjna jime' maj huápuí'ij jaxie've' i túmii, a'yaa mu mij a'íjna jin tyitye'entyipuá'rij tí'ij Dios huo'xíjtye'en, ji'nye pu'ríj á'tyeej ti a'yan a'íimaj jimi tya'tácatyij.

<sup>4</sup> Capu i Dios tyihuo'tú'uunyi'ri' a'íimaj i maj tajapuá tyí'huíiria'ca'aj, i maj tyi'tíj jin ootyá'itzee, sulu a'áa pu huaja'tyáahua'xij jo'maj yá'puejztitaren, ajta ja'tyácun mej mij a'áa

já'nami'huaj jo'tij jo'tíca', a'áa mu ja'avíitzi'huaj muá'ju'un, 'asta na'aj quee Dios huo'xíjtye'en a'ájna xicáara' jitze ti'ij jitzán néijmi'i tye'entyipua'rij. <sup>5</sup> Capu ajta tyihuo'tú'uunyi'ri' a'íimaj i maj ará'tyeej séjria'ca'aj, sulu a'yaa pu tyu'tá' ti i jájtyij tyí'jistej néijmi'que' i cháanacaj japua, ti'ij puéjtzij huo'tá'an a'íjma i maj quee já'astijria'ca'aj i Dios, ajta a'íi pu xaa huáhuu i Noé, i ti a'yan tyihuo'té'exaaj je'ej maj huárinyij mej mij xá'pui' huárinyij i Dios jimi, ajtáhua'aj a'íimaj i séecan i maj aráahua'puaj ará'axcaa. <sup>6</sup> Dios pu ajta huo'xíjtyej a'íjma i maj a'áa jo'cháatima'caa i chájta'naj jitze ti a'yan tyaja'rájtyapuaj tijin Sodoma ajta a Gomorra, néijmi'caa pu huatyáatiej, mej mij a'íjna jin jáamua'reej je'ej ti tyihuá'uuren a'íjma i maj quee já'astijre' i Dios. <sup>7</sup> Ajta a'íj pu japua huatanyúj a'íjci i Lot, i ti tyámua' tyi'tyúucha'íica'aj, ajta je'ej pua'aj ja'axcaa je'ej maj rijcaj i maj juxana'caria'ca'aj a'íimaj i maj quee tyi'tíj já'astyajca'aj. <sup>8</sup> A'íjna i tyéviij ti tyámua' tyi'tyúucha'íica'aj i Dios jimi, jéehua pu jajpuéjtzica'aj i jutzájta' a'íjna jime' maj quee xá'pui' rijcaa ji'nye a'yaa pu tyí'sejraca'aj, ajta tyi'namuajraca'aj i maj je'ej pua'aj rijcaa a'íimaj i maj quee tyi'tíj já'astyajca'aj.

<sup>9</sup> Tavástara' pu jaayí'tin ti hua' japua huatányuunyij tyi'tíj maj jin jajpuéjtzij a'íimaj i maj jimi séejre', ajta jaayí'tin ti hue'tyáanaaj a'íjma i maj je'ej pua'aj tyityetyúucha'íij, ti'ij puéjtzij huo'tá'an a'ájna xicáara' jitze ti jitzán néijmi'caa á'xijtye'en. <sup>10</sup> Tavástara' pu ajta puéjtzij

huo'tá'sij a'íjma i maj huápui'ij je'ej pua'aj ricij, majta quee tyi'tíj já'astijre'. Camu tyi'tíj ja'astej majta óoca'nyej maj cha'mana'aj tyi'tíj jin je'ej pua'aj huárinyij, camu majta tyí'tziinye' mej mij je'ej pua'aj tyihuá'xajtaj a'íjma i maj tajapuá já'sejre', <sup>11</sup> majta a'íimaj i maj tajapuá tyí'huíire', tyij majta jéetze' juca'nyej majta jéetze' va'cán jin antyúumua'reej, camu a'yan tyityóoca'nyej mej mij je'ej pua'aj tyihuá'xajtaj a'íjma i tyétyacaa a'íjna jimi i tavástara'.

<sup>12</sup> A'íimaj i tyétyacaa a'yaa mu een mati'ij i ya'muáatyee: camu tyihuojó'itej, majta cha'mana'aj jo'ojujhua'an, a'yaa mu een jin huanánie'huaca' mej mij huo'vívi', majta je'en huó'cui'nyij. Je'ej mu pua'aj tyá'xaj i tyi'tíj maj quee yó'itej, ajta a'yaa mu cha'taj mana'aj tyí'tyacui'nyij mati'ij a'íimaj i ya'muáatyee, <sup>13</sup> a'yaa mu mij majta tya'ajpuéetzij muá'ju'un mati'ij a'íimaj séecan puéjtzij tyu'tá'. A'yaa mu tyityóomuajtyej maj tyi'tíj jin jutyamua've', a'yaa mu mij ricij tújca'rij tzajta'. Jéehua xu tyévi'si' séejre' a'íjna jime' je'ej siaj tyi'tíj jin ricij hua' jamuán, mati'ijta tyí'ye'estyaj, ji'nye a'íj mu jin jutyamua've' i maj jime' jujímua'aj jucuanamuj.

<sup>14</sup> Camu pújoorej maj íitaj huaséj majta je'en quee jaatanyácuaj, camu a'náj ja'antyápua'citacaa maj á'itzeeria'aj i Dios jimi. Ca'nyíjra'aj mu hua'tá'caa a'íjma i maj quee jéehua juca'nyej mej mij majta tyi'tíj jin je'ej pua'aj huárinyij, jéehua mu jaayl'tin je'ej maj tyi'tíj jin huárinyij, a'íi mu a'ín pué'een i tyeítjee

ì Dios ti puéjtzij huo'tá'sij. <sup>15</sup> Mu'ríj jo'vátzij, jì'nye mu'ríj ajtacíj ì juyéj jítze ti tyámua' een. A'yaa mu mij ricíj tí'ij a'íjna ì Balaam, yójra' a'íjci ì Bosor, ì ti a'yan tyá'xie'va'ca'aj ti túmii huamué'tin a'íjna jìme' ti je'ej pua'aj ricíj, <sup>16</sup> ajta a'yaa pu je'ej tyo'tóomua'aj a'íjna jìme' ti je'ej pua'aj rijcaa, tí'ij ì púuru' tiquee tyo'ríí'rej a'yan tyaaté'exaa tí'ij tyévíj, ajta je'en jaatá'ijmiejri' tí'ij quee tyí'tíj jìn je'ej pua'aj rijcaj a'íjna jìme' ì ti jutímue'.

<sup>17</sup> A'íimaj ì maj a'yan ricíj a'yaa mu een tí'ij jo'tíj ja'tyácun ajta je'en quee arájmuaa, nusu tí'ij ì jéetiríj ti áacaj jáatajchi, a'yaa pu tyihuá'ci'tyíj maj a'áa jo'tyá'ítzeere'en jusén jìme' jo'tíj huápuí'ij jo'tíca'. <sup>18</sup> A'yaa mu a'íjna jìn tyí'xaj ì nyúucarij tiquee tyí'tíj je'ej tyí'xaj, majta ca'nyíjra'aj hua'tá'caa ì séecan mej mij tyí'tíj jìn je'ej pua'aj huárinyíj a'íimaj ì maj moochán jaatapuá'citaca', ì maj je'ej pua'aj tyityetyúucha'iica'aj. <sup>19</sup> A'yaa mu tyihuá'ixaatyé' maj juxáahuaaj séeria'aj muá'ju'un, majta jujíimua'aj ca'nyéjrij jìn tyí'huiire' a'íjna jìme' maj je'ej pua'aj tyityetyúucha'íj, jì'nye a'tíj tina'aj ti ca'nyéjrij jìn tyí'huiire', a'í pu a'yan tyá'huiire' je'ej ti tyí'tíj arí tyeetyáamue'tíj. <sup>20</sup> Jì'nye a'íimaj ì maj meríj jaamua'aj a'íjci ì tavástara' Jesús ì ti ajta Ciríistu' pué'een, a'íimaj mu meríj ajtacíj a'íjci jítze ì ti je'ej pua'aj tyí'een ííyan cháanacaj japua, tipua'aj ajtáhua'aj huo'tyámue'tin a'íjna ì ti je'ej pua'aj een, jéetze' mu je'ej pua'aj rinyíj mequee jájcuaj. <sup>21</sup> Jéetze' pu tyámua' tacaj maj quee a'náj jáamua'tyijche'

a'íjci i juyéj ti tyámua' een, mej mij quee a'yan tyá'mua'reeriaj majta je'en yo'huá'xij a'íjci i nyúucarij ti tyámua' een ti ajta hua' jimi huatyátuiihuaca'. <sup>22</sup> A'yaa pu'ij a'íjma jimi tya'raj je'ej ti tyé'yu'si' i yu'xarij jitze ti a'yan tijn: "A'íjna i tzi'ij, ajtáhua'aj pu pu'ájvej ti'ij jáacua'nyij i jujárie'rij", ajta i ti a'yan tijn: "A'íjna i tuíxuj i maj tyámua' tya'cáajo'sij, ajtáhua'aj pu i jáxu'uj jitze átyi'huaxi'ij."

### 3

#### *A'náj ti ajtáhua'aj yatanyésij i tavástara'*

<sup>1</sup> Nye'ihuáamua' mu nyaj já'muaxie've', a'íi pu a'ín pué'een i yu'xarij ti hua'puaj i nyaj jitzán tyajá'muayu'se'ej. A'yaa nu a'íjci jime' i ti hua'puaj tyá'xie've' nyej nyij ca'nyíjra'aj jamuaata'an siaj sij tyámua' tyú'mua'tyij. <sup>2</sup> Xo'támua'reej je'ej maj ará'tyeej tyu'taxájtaca' a'íimaj i maj Dios jitze ma'can tyí'xajtaca'aj, siajta a'íjci i nyúucarij i ti jamuaatá' a'íjna i tavástara', ti ajta a'ín pué'een i ti ja'mua japua huatányuusij, a'íi pu a'ín pué'een i nyúucarij ti ityájma jimi jaatyájtóo, tyej tyij jamuaaté'exaatye'en.

<sup>3</sup> Siata'aj tyámua' tyá'mua'reeriaj ti a'yan tye'mej, a'ájna xicáara' jitze ti jitzán néijmi'i tye'entyipué'rij, a'íi mu huataséjre'ej i tye'ityee i maj jamuá'xaahuari', je'ej ti a'íimaj tyi-hua'ráanajchi i ti je'ej pua'aj een, <sup>4</sup> a'yaa mu tyu'ta'íhuo'sij tijn: "¿Ji'nye tyi'tíj huaríj a'íjna jime' ti i Ciríistu' ajtáhua'aj ya'uvé'nyesij? Mu'ríj huácuij i tahuásimua'ci'ij, ajta a'yána'aj



óoche' tyí'sejre' i cháanacaj ti'ij jájcuaj imuáj tyu'tyátaavijhuaca'." <sup>5</sup> A'íimaj i tye'ityee camu jaxie've' maj jo'támua'reej ti i tajapuá arí jájcuaj imuáj séjria'ca'aj, ajta i cháanacaj a'yan tyu'séjrej ti'ij i Dios junyúuca jín tyu'ta'íjtaca', ti'ij ajnyéj a jáata', ajta ijíij a'yan tyí'sejre' i jájtyij japua. <sup>6</sup> A'yaa pu ajta jájtyij jín tyu'tyá'uunyi'huaca' i cháanacaj a'ájna imuáj. <sup>7</sup> Ajta i tajapuá ijíij ti séejre' ajta a'íjna i cháanacaj i tyaj a'yan japuan ijíij a'yan séejre', Dios pu jacha'ij ti'ij jaatyáteeraj. A'íi pu i tiéj hua'antyipua'ritye'sij a'ájna xicáara' jitze ti jitzán huá'xijtye'en i junyúuca jime', ajta néijmi'caa jo'riésij a'íimaj i tye'ityee i maj je'ej pua'aj tyityetyúucha'ij.

<sup>8</sup> Siata'aj quee yó'hua'nán, nye'ihuáamua' ti i tavástara' jimi séej xicáj a'yan een ti'ij séej ví'ra'aj nyinyi'ra'aj, ajta séej ví'ra'aj nyinyi'ra'aj a'yan een ti'ij séej xicáj. <sup>9</sup> Capu a'yan huatóomua'aj ti i tavástara' á'tyeeren ti'ij a'yan huárinyij je'ej ti tya'tóoraj, mati'ij séecan tyí'mua'tzej, sulu tyámua' pu tyé'viicue' ja'mua jimi, ji'nye capu jaxie've' ti a'tíj jó'vetyij, sulu mej mij néijmi'i tyá'antzaahuatye'en i Dios jimi.

<sup>10</sup> Ajta i tavástara' a'yaa pu tyo've'nyesij ti'ij i náhua'rij ti avíitzij jín huataséjre'ej i tíca'rij tzajta'. Aj pu'ij i tajapuá ti séejre' huatyú'uunyi'huaj, ca'nyín pu jín je'ej pua'aj huápu'ij huatánamuajre'ej, ajta néijmi'i i ti tyú'taavijhuaca' ajta pu tye'entyipué'rij a'íjna jime' i tiéj, ajta i cháanacaj, jamuán i ti japuan tyí'sejre' a'íi pu tyu'tyátaasij.

11 Ji'nye néijmi'i pu a'yan tyu'tyú'uunyi'huaj, a'yaa pu'ij tyúuxie've' siaj tyámua' tyi-tyetyúucha'íij, siajta néijmi'i jin ja'rá'astijre'en i Dios. 12 Siata'aj jajchó've'e'ej a'náj ti xicáara' jítze uvé'nyesij i Dios, siajta néijmi'i jin tyámua' eenye'. Ji'nye a'ájna xicáara' jítze, a'íjna i tajapuá néijmi'i pu huatyú'uunyi'huaj i tiéj jime', ajta i ti tyú'taavijhuaca' ti'ij ajta jamuán tyí'sejre', a'íi pu ajta néijmi'i tyu'tyátaasij, 13 tyajta ityáj a'íj tu tyicho've', i tajapuá ti jájcuaj tyajta i cháanacaj ti ajta jájcuaj, a'yájna ti'ij i Dios tya'táraj, ajta néijmi'i tyámua' tyi'éenye'e'ej ta'mej.

14 A'íj xu jin nye'ihuáamua' mu nyaj já'muaxie've', ijíij siaj siooj a'yan tye'e'jchó've', siata'aj tyámua' eenye' i Dios jimi, siaj sij quee tyi'tíj jin á'ítzeeria'aj. 15 Siata'aj a'yan tyá'mua'reeriaj ti a'íjna jin já'muacho've' i Dios ti'ij néijmi'caa táahuiire'en. A'íj pu ajta jin tyajamuaatayú'sej a'íjna i ta'ihuáara' Pablo i tyaj jaxie've', Dios pu a'yan tyaatá' ti'ij yo'itéej já'ra'nyij tyámua' naa. 16 Néijmi'i i ti jítzán tyajamuaatayú'sej a'yaa pu cha'tána'aj tyajamuáa'ixaa, tyij ajta je'caquéj muárie'rij ti a'tíj yo'itéej já'ra'nyij i nyúucarij, a'íj mu jin séecan i tye'ityee i maj quee tyi'tíj mua'reej i maj majta quee xu jéehua tyé'viicue' i maj jin tyá'tzaahuatye' a'yaa mu mij a'íjna jin tyí'tyese' mej mij seequéj tyiyo'itéej muá'ra'nyij, a'íi mu mij seequéj ja'uurej i nyúucarij, a'íj mu mij jin jujíimua'aj antyúupua'ritye'sij.

17 A'yaa pu'ij nye'ihuáamua' mu nyaj

já'muaxie've', mua'aj xu seríj jamua'reej, siata'aj sij tyámua' tyityahuóocha'iin, mej mij quee tyi'tíj jin jamuáacuanamuaj a'íimaj i maj je'ej pua'aj tyí'tyetyeityee, nusu sij a'yan huárinyij je'ej maj a'íimaj tyí'ijta. <sup>18</sup> Siajta mua'aj siata'aj jéetze' tyámua' tyáamua'tyij a'íjci i tavástara' ti ajta Ciríistu' pué'een, siata'aj a'íjna jin huahuóse'en i sij jin huóoxie've'en. Tyiche' a'náj tina'aj tyé'tyotzi're'ej. Che' a'yan tyá'ra'nyij.

**I nyúucarij ti jájcua ti a'ijna á'xaj i  
Tavástara' i Jesús ti Ciríistu' pue'een ajta  
Salmos  
Cora, Santa Teresa: I nyúucarij ti jájcua ti a'ijna  
á'xaj i Tavástara' i Jesús ti Ciríistu' pue'een ajta  
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

4f03662f-a4e0-5c7c-a13b-0b7002b5b8f6